



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**US sorkar shibangba tembangtsü bill
nung Trump-i meyongnem agütsüogo**

**Shane Watson Kolkata Knight
Riders assistant coach kümogo**

VOL. XXIII ISSUE NO. 38 (ADOK 38) DIMAPUR ROGONÜ (FRIDAY) YIMPOKSÜI (NOVEMBER) 14, 2025

₹ 5.00

Nagaland sorkari kaketshir 41,000 tema nem scholarship agütsüogo

Dimapur, November 13, 2025 (TYO): Nagaland nung Directorate of Higher Education ajanga lisopur kaketshir 41,793 nem scholarships agütsüogo.

Iba ya 2024-25 academic year atema lir aser Post-Matric Scholarship scheme kübok scholarships lema agütsü. November 11, 2025 tashi nung kaketshir ajaki scholarships indang final phase nguogo.

Iba scheme ya Ministry of Tribal Affairs-i tenzükba lir aser küm nung Rs 2.5 lakh mengutetba Scheduled Tribe kibongtem nungi kaketshirtem nem Class XI nungi shir zünga aotsü atema teyari agütsür.

Iba scholarship ya shilem ana lemsar agütsü aser mezüngbubaji June 2025 nung kaketshir 22,412 nem one-time full payment ama Rs 3,071.49 lakh agütsü. Centre nem utilisation certificates agütsüba sülen state keti tanüngba funds aru.

Ministry of Tribal Affairs-i October 28, 2025 nü parnok lemozüksüba Rs 2,309.91 lakh agütsü aser iba den state shilem enoksemer November 10 nü scholarship account nung enoksüogo.

Scholarship agütsüba tanabuba sshilem nung kaketshir 19,381 nem Rs 2,566.57 lakh agütsüogo.

Tanabuba shilem nung scholarships manguba

kaketshirtemi parnok bank accounts den sendaktepa aliba Aadhaar jangjashitsü aser Direct Benefit Transfer payments asütsü ayongzüker ta directorate-i metetdaksüogo.

Iba scholarship angur tenüng ajunga highereducation.nagaland.gov.in nung reprangtsü akok ta parnokisa ashi.

Iba ya centrally sponsored scheme ka lir aser Centre o state tsüngda 90:10 funding ratio lir aser National Scholarship Portal ajanga dang ketdangsüa repranger.

Kaketshirtemi online ajanga tenüng agütsür aser mezüng Institution Nodal Officers ajanga parnok jangjatepba sülen state department-i jangjashir. Senotsü ya Aadhaar-Based Payment System ajanga dang agütsür.

"Iba maparen nung application nungi verification aser payment tashi digital lir aser iba ya tashishitsü malitsü, shitak inyaksü aser tetsükdaksü majurutsü atema lir" ta directorate-isa metetdaksüogo.

Centre sorkar nungi sen aruba sülen state sorkari parnok lemozükba sen enoksemer scholarships agütsür. Ministry of Tribal Affairs nungi sen aruba sülen ang kaketshir nem scholarships agütsür ta directorate-isa ashi.

NIA-i Tripura, Meghalaya nung Al-Qaeda anema mita ao

Guwahati, November 13, 2025 (Agencies): National Investigation Agency (NIA)-i Tripura aser Meghalaya den tanga state asem nung Al-Qaeda kiralongraba tasa atema bushisüngdang süogo.

Iba maparen nung ozüng alema arur Bangladeshi nunger dena lir aser NIA-i tesem aika mita senzüogo.

November 12, 2025 nü West Bengal, Tripura, Meghalaya, Haryana, aser Gujarat nung temulung melemi bilemertem aser parnok den yaritepertem den sendaktepa aliba tesem 10 mita ao. Iba mapang digital devices aser taitüsü aketba kulikakettem ngutetogo aser itemji forensic analysis atema yokogo.

Iba ya Al-Qaida Gujarat ken o atema lir aser NIA-i June 2023 nung Unlawful Activities (Prevention) Act, Indian Penal Code aser Foreigners Act kübok

benokba liasü.

"Iba tasa atongba nung Bangladeshi nunger pezü dak tongti süa temulung melemi bilemer. Parnok ya Mohd. Sojibmiyan, Munna Khalid Ansari, Azarul Islam aser Abdul Latif nunger lir aser parnoki taila Indian identity documents amshia Bangladesh nungi India-i aru" ta NIA-i ashir.

Iba telok jagi Al-Qaida den sendaktepa lir. Parnoki Bangladesh nung Al Qaida nübotem asoshi senotsü benden aser bener yok. Parnoki Muslim lanurtem kanga ajungmesoa aru ta NIA-i sangdong ka nung ashi.

November 10, 2023 nü NIA Special Court, Ahmedabad tsüngdang NIA-i nisung pungu anema chargesheet ka benoka liasü aser kiralongraba telok ajunga makdoktsü atema bushisüngdanga arur.

Union Finance Minister-i Kiphire aspirational district semdang



Union Finance Minister and Corporate Affairs, Nirmala Sitharaman-i District Hospital, Kiphire nem SBI indang CSR Projects agütsüdang agiba noksa ka angur.

Dimapur, November 13, 2025 (TYO): Union Finance Minister and Corporate Affairs, Government of India, Nirmala Sitharaman-i November 13, 2025 nü District Hospital Kiphire semdangogo.

Iba mapang Sitharaman-i District Hospital Kiphire nem State Bank of India (SBI) indang Corporate Social Responsibilities (CSR) agütsü.

"State sorkar aser Kiphire district administration-i pelashishia agizükba atema pelar. Tobur tajung Nagaland semdangtsü ano maangka anguba atema kanga pelar" ta Sitharaman-i ashi.

Kiphire aspirational district semdangtsü atema sentong renema liasü aser idaki nübortem taginübatem aser CSR projects balala inyakba reprangi arutetba atema pelar ta laisa shisem.

State sorkar den sensaksemdang Nagaland nung senotsü peria maliba indang angatetogo aser iba jagi Nagaland semdangi arudang CSR karbosa bener arur ta Sitharaman-i

metetdaksü.

SBI-i CSR project kübok District Hospital Kiphire (DHK) nem nüngdakba osettsüsütem agütsüba atema pelar. Tanü medical tayongzükbatem aser nüngdaktem onsara kümogo anungji diagnostic treatment atema modern equipment nüngdaker, ta laisa ashi.

Sitharaman-i hospital staff den sensaksemdang nübo peria maliba khuret lemsatep. Parnokisa Kiphire nung government hospital dak alaka private hospital ka danga maliba metetdaksü.

Iba sentong nung SBI-i CSR project kübok District Hospital Kiphire nem Rs. 5.81 lakhs alang blood bank atema osettem, hospital atema Rs. 59 lakhs alang osettem, Kiphire district nung Primary Health Centres atema Bike Ambulance 5 aser multi-utility bike ambulance 5 agütsüogo.

Union Finance Minister-i District Hospital Kiphire nung Bike Ambulance sayatsü aser Medical Superintendent, Kiphire Dr. Watsutho Nyuthe-i District

Hospital Kiphire indang osang tatsüka lemsatep.

Sentong nung mendenji Principal Director, Directorate of Health & Family Welfare Nagaland, Kohima Dr. Mereninla Senlem liasü aser Chief Medical Officer, Kiphire Dr. R. Wapang Imchen-i Department of Health and Family Welfare tenüng nung anküp tepela o jembi.

Delhi nungi ketdangsürtem, state sorkar, civil society organizations, medical team aser shilem agir ajak dang pelar ta Dr. R Wapang-i ashi.

Tourism and Higher Education Minister Imna Along aser tongti ketdangsürtemi Union Finance Minister Sitharaman meina aru.

Tanü nikongdang 14th NAP (IR) Battalion, Kiphire nung Sitharaman nem tetushi agüja sobaliba sentong ka ayongzüka amung.

Nirmala Sitharaman-i Kiphire district semdangba atema tetushi agüja November 14, 2025 nü Public Ground Kiphire nung Public programme ka agütsü.

Nagaland nung Reservation Review Commission tasen ka tentet

Dimapur, November 13, 2025 (TYO): Nagaland nung kintem public employment aser higher education nung shilem agiba asadangtsü atema state sorkari Reservation Review Commission tasen ka tentetogo.

Tangar memeneper ta züngshia quotas aser criteria lateta aliba meyipa reprangshitsü jembia aruba sülen sorkari iba mapa inyakogo.

Reservation Review Commission nung mendenji retired IAS officer R Ramakrishnan asütsü aser Home, Law and Justice, Higher and Technical Education, aser Personnel and Administrative Reforms departments nungi tongti ketdangsürtemi züngsemtem ama inyaksü.

Külen, iba Commission nem Home Department-i logistical support agütsütsü aser Finance Department-i budget requirements reprangtsü.

Commission-i nüngdak ta asüba government records ajak reprangtsü tashi agütsüogo. Parnoki official mesüra department mashii ka jaoka osang metetpelatsü akok.

India nung reservations atema constitutional aser legal provisions meyipa reprangshitsü, economic aser educational indicators reprangtsü aser Nagaland nung employment indang policy aser technical o professional courses nung admissions asüba maparen ajak iba Commission-i reprangshimtsü

nungloksüogo.

Parnoki lisopur teloktem, kaketshir teloktem, employees' associations aser sendaktepa alir ajak den asüngdangteptsü. Parnoki reservation atema kintem jangjatsü, overall percentage aser internal distribution shidangtsü aser ibala tajangzüka mapang agütsü telatet agütsütsü.

Commission nem ita trok tashi nung report ka agütsütsü mapang züngzüksüogo. Iba Commission nung chairperson atema remuneration ji tanga sangdong ka nung metetdaksütsü.

Iba tetuyuba ya October 21, 2025 nü Cabinet approval den külemi agütsüogo aser September 22, 2025 nü sangdong agütsüba agiener.

Minister Kruse-i Midland Community Hall cum Parking facility semzüksü



Minister, Women Resource Development and Horticulture, Salhoutuonuo Kruse-i November 13, 2025 nü Kohima Municipal Council indang Ward No. 9 kübok Midland Community Hall-cum-Car Parking Facility semzüksüba sentong nung tangokba noksa ka angur.

Kohima, Yimpoksüi/Nov. 13 (TYO): Minister, Women Resource Development and Horticulture, Salhoutuonuo Kruse-i Brehostibarnü Kohima Municipal Council indang Ward No. 9 kübok Midland Community Hall-cum-Car Parking Facility semzüksüo.

Iba sentong nung jembidang, ibai tesem yangluba, tejakleni aoba, amalitep akaba aser nübur asoshi terenlok lir aser iba project ajanga sorkar indang grassroots development nukla sayur aser Kohima nung colony aser ward tem nung alir takum tajungba kumdaktsütsü asoshi temulung agütsüba angur, ta Minister Kruse-i ashi.

State yimtiba nung urban areas nung tesem mesümenangba, ki o jen tejen akumba, metzü meshiba nung timtem ajuruba aser terenlok maparen asoshi ali peria maliba tebilemtsü lir, anungji urban planning nung angatettepa inyaktsüla aser nüburtemi shilem agitsüla, ta lai ashi.

"Kohima tajungba kuma yangertsü asoshi asenok lungjemer inyakba temaitsü iba community hall ya lir. Ibai nüburtem lungjemdaktsütsü aser arok tanüla adokdaktsütsüa yangluba lir," ta lai ashi.

Iba den metenloka parking facility yangluba ya lenmang

mesümenangba tebilemtsü ajemba kisung masü saka danga colony tem asoshi tatishitsü tajung alitsü, kechiaser tapi agi gari anena ayuba ajanga nüburtem timtem ajurur, ta ashi.

Ali tenlar, KSCDL, contractors, local authorities aser Midland Council densema iba project nung shilem agir ajunga pelaba lemsatepdang, iba ama teka amteper inyakba ya nübur dak rangloker terenlok mapa inyakba tanüla aliba sayur, ta Minister-i ashi.

Laisa yangji alirtem dang iba facility meima amshitsü ajungshi aser ibai lokti, sobaliba aser shisaliok asoshi tesepep tajung ka kumdaktsütsü ayongzüka liasü.

Kasa mapang CEO of Kohima Smart City Development Limited (KSCDL), Kezhazhelhou Theunuo-i iba project indang osang tejangja lemsatepba mapang iba community hall yanglutsü atema March 31, 2022 nung M/S Engineering Station nem sen 2.91 crore agi yanglutsü sanction asü, ta ashi.

Project nungya civil works, site development, electrification, water supply, sanitary fittings aser tzünglu tzü bendena ayutsü dena liasü.

Iba ki indang plinth area ya 7,800 sq. ft. aser yangji floor asem - ground (1,755 sq. ft.),

first (2,925 sq. ft.), aser second (3,120 sq. ft.) lir. Yangji gari 12 anena yutettsü, conference hall ka, office takdang ana, sorochiokdak tesem ka aser temalen aliba floors anaprong nung metzü meshiba tesem lir.

KSCDL ajanga Slum Area Redevelopment kübok New Market, Daklane, Nagabazar, Kitsübozou, North Block (Kezieke), aser D. Block nung iba mesük community buildings yanglua yangji aliba councils temi kanga junga anepalutar, ta Theunuo-isa ashi.

Iba tesem semzükba sülen ki o jen tasenba anepalutsü aser ketdangtsütsü atema KSCDL aser Midland Council tsungta agreement ka zülutepa liasü.

Parking aser hall amshiba atema sen tera meshitsü aser KSCDL aser Council tsungta lemsatsü.

Sentong nung Viphrezo Zao menden liasü, Rev. Medoneiu Usou, Pastor, Midland Baptist Church Kohima ajanga sarasadema sentong tenzük aser Keduozolie Nihu, Advisor Midland Council ajanga pela agizükba o jembia liasü.

BKK Midland Baptist Church Kohima ajanga temeja ken ka aten aser Tsao Paphino, vice chairman Midland Council ajanga melepzüng o jembia liasü.

Kohima DC ajanga tenokdangba ka agütsür

Dimapur, Yimpoksüi/Nov. 13 (TYO): Deputy Commissioner, Kohima, B. Henok Buchem, NCS ajanga Kohima district nung footpaths ama nüburtemi amshiba tesemtem temelaba makai agia aruba nokdanga totuyuba ka agütsüo.

Nüburtemi amshiba tesemtem, talisa tetsüng lenmang tem ya yimtung nung yokyayokchir, hawkers aser temelaba makai ki o jen yangluba ajanga nokdanga tetsüng agi senzürtem aser gari senzüsempongba nung kongshir, ta ashi.

Nüburtem senzüba tesem

nung teti asoshi mesüra khen atema structures songa ayuba ajanga tetsüng agi aser gari nung senzürtem nem timtem agütsür aser lendong ajurutsüa lir.

Anungji, nüburtem kumzüka ayutsü mechi temelaba makai Kohima district nung footpaths ama nüburtemi amshiba tesem nung temelaba makai structure yangluba aser inyaksangshiba tang nungi tenzüka kanga sashia nokdang, ta ashi.

Aibelener nem District Administration ajanga tapet temerenshi agütsütsü, ta Kohima DC sangdong ajangasa ashi.

Kohima nung "Echoing Our Roots" sentong ayongzü



Kohima, Yimpoksüi/Nov. 13 (TYO): Indian Council for Cultural Relations (ICCR), Zone, North East ajanga Department of Art & Culture, Government of Nagaland den lungjemer November 12, 2025 nü State Academy Hall, Kohima nung "Echoing Our Roots" nungja agütsür sobaliba sentong ka ayongzüka liasü.

Iba sentong nung Pfhesi Kro-u ajanga sobaliba ken tena Naga nunger sobaliba tajung benjonga liasü. Pfhesi Kro-u ya asen tetsü-tebou nungeri tenshia aruba ken aser rhytms wazüka ayutsü asoshi inyaker.

Iba sentong nung tongti tesemdang Bodeno S. Colo, Secretary, Department of Art & Culture ajanga shilem agirtem nem tenüngsang agütsü aser department-i traditional art forms anitettsü aser ajungkettsü meranga inyaker ta ashi.

N. Munish Singh, Zonal Director, ICCR North East

Region ajanga iba sentong ayongzüka nukjidong lemsatepdang ICCR ajanga Naga artists asoshi maongka agütsüba lemsatepa liasü.

Tetsü-tebou ken, tsüngsang aser sobaliba nung inyakba artists aser telok tem empanelment inyakyim pai rateta ashi aser parnok dang national aser international cultural exchanges nung shilem agitsü ajungshia liasü.

Iba sentong tenzüka Vevolu Bernice Tunyi-i sarasadem aser Deputy Director, Department of Art & Culture, Teisovikuolie Therie-i pela agizükba o jembia.

Pfhesi Kro-u ajanga Naga nunger takum, jenjang aser tanüla angatetdakja shilem agi.

Parnoki atenba ken ajanga sobaliba tera nung sendaktepdakja liasü.

Sentong tembanga Deputy Director, Department of Art & Culture, Kevingulie Tachü-i melepzüng o jembia.

Assam Rifles-i Kohima nung Ex-Servicement Outreach ayongzü



Dimapur, Yimpoksüi/Nov. 13 (TYO): Director General Assam Rifles (DGAR), Shillong tawabangba kübok Assam Rifles Ex-Servicemen (ESM) Centre, Kohima ajanga November 12, 2025 nü Outreach Drive ka Assam Rifles Kohima Garrison Battalion nung ayongzüka liasü.

Iba sentong nung Assam Rifles Ex-Servicemen Association (ARESA), Kohima kübok Kohima, Jalukie aser Wokha district tem nungi sepai tejen, (asür) sepai kinungtsü aser Next of Kin (NOK) family pensioners ajak agi nisung 85 arua shilem agia liasü.

Iba sentong nung Merman Pradhan, President, ARESA Kohima, aser Bobita Pradhan, Secretary, ARESA Kohima menden liasü, kong sepai tejen temi timtem ajuruba indang lemsatepba tem bentetja 2IC R. Pathania aser Assistant Commandant Sudeep Lama densema Veteran Cell, HQ DGAR Shillong nungi ketdangsur temi jembia liasü.

Iba sentong nung ARESA initiatives, welfare policies, grants indang lecture agütsü aser Officer-in-Charge, ECHS Kohima ajanga ECHS teyari indang tejangja lemsatepa liasü.

SBI, ICICI aser Axis Bank nungi ketdangsurtemi senotsü dak sendakba aser pesion dak sendakba scheme balala indang angatetdakja liasü.

Kasa sentong nung Commandant, Assam Rifles Kohima Garrison Battalion ajanga ex-servicemen tain aser NOK family pensioners nem ajok ana aser hearing aids pezü agüja liasü.

Kasa sentong nung medical camp aliba nung sepai tejen 50 dak tema teyari agi, aser Sampark Setu App nung ex-servicemen 55 tashi register süa liasü.

Niuland nung Unity March ayongzü

Dimapur, Yimpoksüi/Nov. 13 (TYO): Department of Youth Affairs & Sports, My Bharat - Niuland ajanga District Administration den lungjemer Sardar Vallabhbhai Patel sor küm 150 ajungba bilemteta November 13, 2025 nü Niuland Town nung Unity March ayongzüka liasü.

Deputy Commissioner Niuland, Sara S Jamir-i iba Unity March ya Niuland Town Clock nungi tenzütsü.

Iba Unity March tembangba sentong nung DC Niuland ajanga Sardar Vallabhbhai Patel takum otsü tongmelang agi lemsatep aser linük lungjemdaktsüba asoshi pa dang Iron man of India ta ajar ta ashi.

Lai lanurtem dang Patel dak aliba sempet amshitsü aser

telungjem aser tesendaktep tajung asoshi külemi inyakttsü ayongzüka liasü.

Department of Youth Affairs & Sports ajanga iba sentong ayongzüka atema DC Niuland ajanga pelaba lemsatepa liasü.

Deputy Commissioner of Police, Niuland, Manish Bhartiya, IPS ajanga sentong nung o tatsüka jembidang, asüng asoshi lenir akumtsü lanurtem ayongzüka liasü.

Sentong nung GHSS Niuland nungi kaketshir temi sobaliba yimya nung shilem agi, RHSM School nungi Limeka aser GHSS nungi Vilotoli Yephtho nati o tatsütsü jembia liasü.

Sentong nung K. Manikanta, District Youth Officer, My Bharat menden liasü.

Red Fort lendong dak sendakba nung ano nisung ana puogo



Delhi Red Fort lendong nung sendaka alitsü ta temulung melemi bilemba Ford Ecosport gari temerem ka Faridabad kübok Khandawali district nung ngutetba sülen Central Forensic Science Laboratory ketdangsürtem gari ngutetba tesem tonga aiba sülen tangokba noksa nung angur.

New Delhi, Yimpoksüi/ November 13 (Agencies): Delhi Red Fort nung gari ka apokba lendong dak sendakba nung police-i ano nisung ka Faridabad nung Al Falah University nungi puogo.

Iba nisungba ya Zamil ta jangjaogo aser pa apuba ya Brehostibarnü sangdonga liasü. Ketdangsürtemi ashiba agi pa ya züngsem tasen bushia oa ansemer ka liasü.

Brehostibarnüsa police-i Faridabad kübok Khandawali yimtsüng nung Red Ford EcoSport anena ayusang puogo. Iba nisungba ya Faheem ta jangjaogo, shiba Delhi Red Fort lendong nung aija alirtem rognung tongtiba Dr Umar Nabi'er kinunger lir.

Sepaitemisa iba gari anena yua aliba tesem temeket meter 200 meketbanga ayu aser bomb disposal squad ka gari asadangtsü atema yoka liasü.

Fahim ya Delhi police nem bendanga agütsüogo.

Taoba mapang Delhi Police-i, Ford EcoSport gari temerem ka meita atatsü atema police station, police outpost aser arrtsü nung checkpoint ajak dangi osang yoka liasü.

Ken o dak sendakba nung temulung melemi bilemsang yagi IED abentsü atema gari asem-Hyundai i20 temesüng ka, EcoSport temerem ka aser Maruti Suzuki Brezza ka aliba indang bushisüngdang ajanga ngutetba sülen tekümdangtsü metetdakja liasü.

Ken o dak sendakba nung gari tasembuba maneni bushidar.

Osang balala ajanga ashiba agi, Ford EcoSport ya Dr Umar Nabi tenüng nung züngoksema liasü. Umar-i iba gari ya tesem balala asadangtsü atema amshia liasü.

Maneni kiralongrar den sendaka aliba ken o ka nung Hombarnü ketdangsürtemi Jaish-e-Mohammed aser Ansar Ghazwat-ul-Hind ta kiralongrar telok den sendaka aliba "white collar terror module" ka puteta liasü. Iba module ya Jammu and Kashmir, Haryana aser Uttar Pradesh nung inyaksangshia liasü. Parnoki bomb yangludang amshiba oset seret 2,900 apuba den Faridabad nung Al Falah University den sendaka aliba doctor asem densema nisung ti pua liasü.

Iba sülen ghonda ishika dang lir Red Ford metro station anasa meyilongi senzüa aliba gari ka poka nisung 10 tepset aser

nisung aika yirua liasü. Brehostibarnü DNA tetendangba ajanga gari ya Dr Umar-i ania liasü ta jangjaogo.

Mannei Anti-Terrorist Squad (ATS) aser National Investigation Agency (NIA) nati Ganesh Shankar Vidyarthi Memorial (GSVM) cardiology department nung senior resident doctor Dr. Mohammad Arif sota yuogo.

November 9 nü Faridabad terror module ken o dak sendakba nung apuba Lucknow nung amendaker aliba doctor Dr. Shaheen Saeed indang phone record asadangba mapang Arif tenüng adoka liasü.

Dr. Arif ya Kanpur kübok Ashok Nagar tesem nungi Bodhbarnü aonung pua liasü. "Itangitertem osang dak ajemdaker ATS-i, pa aliba ki meita ao aser ken o ashishitsü atema pa sota liasü. Pa indang personal electronic device aser communication record tem forensic analysis atema meshizükogo. Pa aliba ki kibur dang dena ken o ashishiogo aser ken o dak sendaka aliba tanga kuli kakettem asadanga liasü," ta ken o jangja aliba ketdangsür kati metetdaksü.

Police team temi Bodhbarnü Al-Falah University aser Dr Muzammil Ganaie'er ki semdang. Ganaie ya iba ken o nung temulung melemi bilemertem rongnung tongti ka lir. Parnokisa university nung doctor aser kaketshirtem aika dang ken o ashishiogo.

Cardiology department tekolakba Dr. Umeshwar

Pandey-i ashiba agi, "ken o ashishitsü atema ATS-i Dr. Arif anir aoba onoki tangang meteter. Iba dak alaka onok ket nung kecha osang mali."

Pandey-i ashiba agi, MBBS aser MD atemba sülen Dr. Arif ya first-year resident doctor ama iba institute nung aden. First-year resident tem atema hostel facility peria maliba ajanga parnok campus tema nung lia liasü.

Dr. Arif ya Jammu and Kashmir nungi lir aser pa Government Medical College, Thiruvananthapuram (Trivandrum) nung medicine azüng ta tanga ketdangsür kati ashi. "Pa ya qualified interventional cardiologist ka lir aser NEET-SS 2024 batch nung shilem ka ama taoba ita pezü tashi GSVM Medical College nung interventional cardiology nung advanced training agia liasü," ta pai shisem.

Ketdangsür yagisa, Dr. Arif ya Dr. Shaheen Saeed den sendaktepa aliba ajanga ken o ashishitsü atema sota yuogo.

Arishi küm 43 tain Dr Shaheen shiba Kanpur nung sorkar medical lecturer ka liasü, la-a terror module ka den sendaktepa aliba atema puogo. Bushisüngdangertemi ashiba agi, Shaheen ya Faridabad nung Dr Muzammil Ahmad Ganaia den lia liasü, shiba iba module dak sendakba nung temulung melemi bilemertem rongnung ka lir. Tena ya tetongtechi liasü, ta Uttar Pradesh Anti-Terrorism Squad (ATS) nungi ketdangsürtemi ashi.

India aser Nepal rail ajanga shishilemba akangshitsü

New Delhi, Yimpoksüi/ November 13 (Agencies): India aser Nepal nati Jogbani (India) aser Biratnagar (Nepal) na tsüngda train ajanga khu abentsü mulungtepogo, aser iba yagi linük ana tsüngda rail ajanga shishilembaba tsütsü tesendaktep tajungba kümdaktsütsü ta commerce ministry-i ashi.

Union commerce minister Piyush Goyal aser Nepal indang minister for industry, commerce and supplies, Anil Kumar Sinha na tsüngda Brehostibarnü New Delhi nung senden amenba mapang iba telemtetba ya agia liasü.

India aser Nepal na train ajanga khu abentsü asoshi nangzüktepogo. "Iba tenangzüktepba nung sign asüba ajanga Jogbani (India) aser Biratnagar (Nepal) na tsüngda train ajnga khu belenshitsü asoshi teyari agütsütsü kong khu aika belenshitsüba densema lir," ta kasa sangdong ajanga metetdaksü.

Iba inyakyim ya Kolkata-Jogbani, Kolkata-Nautanwa

(Sunauli), aser Visakhapatnam-Nautanwa (Sunauli) tashi atsülanga aotsü aser iba ajanga linük ana tsüngda multimodal trade tashi taitba kümdaktsütsü aser linük tasembuba den shishilemba tajungba kümdaktsütsü asoshi Nepal nem teyari agütsütsü, ta ministry-i ashi,

Iba tenangzüktepba yangluba ajanga Kolkata aser Visakhapatnam nung rongnendak balala nungi Nepal kübok Biratnagar anasa Morang district nung amenoka aliba Nepal Customs Yard cargo station tashi khu tulutem bener aotsü lenmang lapoktsütsü.

Iba train lenmang ya India sorkari senotsü teyari agüja yanglu aser India aser Nepala Ato Kilonser nti külemi 2023 küm June 1 nü lapokja liasü.

India ya Nepal atema shishilembaba tsütsü aser investment partner tulutiba lir. Iba jenjang tasen agiba ajanga linük ana tsüngda rongsenketzüing nung tesendaktep tajungba kümdaktsütsü imlar.

Punjab police-i kiralongrar den sendaka alir nisung 10 apu

New Delhi, Yimpoksüi/ November 13 (Agencies): Ludhiana Commissionerate Police-i Brehostibarnü, Pakistan indang Inter Services Intelligence (ISI)-i teyari agütsür asütsü ta temulung melemi bilemba grenade-attack module ka atema inyaker nisung 10 puogo.

DGP Punjab police-i X ajanga ashiba agi, Punjab nung nisung aika aliba tesem ka grenade amshia amaktsü atema iba module nem ya nonglokja liasü.

Ken o bushisüngdangba sülen police-i niung 10 pur, shirnok Pakistan nung amendaker aliba handler aser Malaysia nung amendaker aliba operative asem den sendaktepa aruba ngutetogo. Parnok ya grenade tem agizüka agütsütsü asoshi sendaktepa liasü, ta tweet ajanga ashi.

"Ludhiana Commissionerate Police-i, ISI-Pakistan-i teyari agütsüba grenade attack module ka puteta bendanglen amendaker aliba handler tem atema inyaktsür nisung 10 puogo. Ken o bushisüngdangba sülen aija alirtem ya Pakistan aser Malaysia

nung amendaka aliba handler tem den grenade agizüktsü aser agütsütsü atema sendaktepa aruba ngutetogo," ta kasa sangdong ajanga metetdaksü.

Aija alirtem nem ya bendanglen amendaker aliba handler temi state mesüngjemtetü kümdaktsütsü atema grenade amshia tesem ka amaktsü tetuyuba agüja liasü. "State mesüngjemtetü kümdaktsütsü atema nisung aika aliba tesem ka grenade amshia amaktsü asoshi handler temi tetuyuba agüja liasü," ta police-i ashi.

Kasa sangdong ajangasa, kiralongrartem samatsütsü aser arrtsü adena kiralongrartem tesendaktep atongsaja Punjab teküzmükba kübok yimjung nung toktsütsü Punjab Police bendanga agütsür lir, ta metetdaksü.

Linük nung kiralongrar den sendaktepa alirtem anema jenjang agia aoba mapang item nisungtem ket nungi ngutetba hadirtem aser handler tem maitsü nüburtem nem memetetdaksüi lir, keciyong iba ajanga inyakyim nung tetsükdaktsü adoktsü akok.

इंडियन बैंकIndian Bank ALLAHABAD		Zonal Office : Dibrugarh T.R. Phukan Road, Chiring Chapori, P.O.: Dibrugarh- 786001 E-mail: zodibrugarh@indianbank.co.in		KIOJEN AYOKTSÜ NOTICE		APPENDIX- IV-A [SEE PROVISO TO RULE 8 (6)] SALE NOTICE FOR SALE OF IMMOVABLE PROPERTIES E-Auction Sale Notice for sale of Immovable Assets under the Securitisation and Reconstruction of Financial Assets and Enforcement of Security Interest Act, 2002 read with proviso to Rule 8 (6), 6 (2) & 9 (1) of the Security Interest (Enforcement) Rules, 2002		
Public aser talisa sen apur (tem) aser Guarantor (tem) dang ya sangdonger, tsünglanglen shia aliba kiojen ya Secured Creditor dang mortgaged süa liasü aser iba kiojen ya Indian Bank nung Authorized Officer-i agiadokogo aser 10.12.2025 anogo nung "Kong aliar yamaji", "Koma lidir yamaji", aser "Yangji aliba ajak" basis nung ayoktsü. E-auction ajanga ayoktsü aliba kiojen osang tejangja teküboklen agütsür:								
Branch		A) Name ef the Borrower/Guarantor/Mortgagor B) Due Amount			a) Details of the Immovable Property b) Property ID No.		a) Reserve Price b) EMD c) Bid Increment Amount d) Any Encumbrances on property	
Dimapur		A) Borrower- M/s. Aki Automotives India Private Limited {Directors: (1) Mr. Kiyelu Sumi and (2) Ms. Kimiyetoli Achumi}, Address: 5th Mile, Near Faith Service (Indian Oil Petrol Pump), Dimapur (Nagaland), PIN- 797115; Director & Guarantor- Mr. Kiyelu Sumi, S/o Lt. Kikheto Sumi, Address: H/No. 128, 4th Mile, Diphupar A, Dimapur (Nagaland), PIN- 797115; Director cum Guarantor cum Mortgagor- Mr. Akato Sumi, S/o Lt. Kikheto Sumi, Address: H/No. 53, Thilixa Village, Block 1, Dimapur (Nagaland), PIN- 797111; Guarantor- Ms. Nukshikala Jamir, W/o Akai Aye, Address: H/No. 53, Thilixa Village, Block 1, Dimapur (Nagaland) PIN- 797111; Guarantor- Ms. Kimiyetoli Achumi, D/o Shri Atobo Achumi, Address: H/No. 128, 4th Mile, Diphupar A, Dimapur (Nagaland) PIN- 797115 B) Rs. 4,35,67,621/- (Rupees Four Crore Thirty Five Lakh Sixty Seven Thousand Six Hundred and Twenty One only) as on 22.09.2025 with further interest, costs, other charges and expenses thereon.			a) Dimapur, Nagaland nung Faith Hospital anasa Sewak Gate nung Akato Sumi tenüng nung aliba kiojen aser yangji aliba ajak, ali tasazük 2377 sqft, Patta No. 1484, Dag No. 107/1647, Mouza No. 02, Block No. 09 vide Registered Sale Deed No. 2425/10 anogo 22.10.2010. Arrtsü yamai lir:- North tsütsülen Mr. Sukhato Sema'er kimong, South tsütsülen Meis Honglung Damei, East tsütsülen Mr. F. Pathwari aser West tsütsülen Main Road, Sewak Road. b) IDIB50482809247		a) Rs. 2,49,22,000/- (Rupees Two Crore Forty Nine Lakh Twenty Two Thousand only) b) Rs. 24,92,200/- (Rupees Twenty Four Lakh Ninety Two Thousand and Two Hundred only) c) Rs. 50,000/- (Rupees Fifty Thousand only) d) Not Known any	
e-Auction Anogo & Mapang: 10.12.2025anogo nung nikongdang 1:00 ako nungi 5:00 ako tashi aser mapang telatet makai minute 10 atsülangtsü					EMD amount agütsütsü atema tatembangbuba Anogo & Mapang: 10.12.2025 nikongdang 05:00 ako tashi.			
Telatetbatem tejangja atema yangi tongtepratepang Branch Manager : (A) Dimapur : 8003441456; (B) Zonal Office Dibrugarh: 9628610699								
Bid asütsüpurtem dang website (https://baanknet.com) nung onok indang e-auction service provider PSB Alliance Pvt. Ltd. ajanga online ajanga bid asütsü metetdaksür. Technical Assistance atema 8291220220 nung call süang. Registration status aser EMD status atema support.baanknet@psballiance.com dangi email süang. Kiojen osang tejangja den kiojen noksa aser auction indang telatetbatem jangjatsü atema https://baanknet.com nung reprangang aser iba portal dak sendakba metetpelatsü atema PSB Alliance Pvt. Ltd. den Contact No. 8291220220 ajanga tongtepratepang. Bid asütsüpurtem dang, website https://baanknet.com nung kiojen bushiba mapang nung tekalen shia aliba Property ID Number amshitsü metetdaksür. Date: 12.11.2025, Place: Dimapur								
Authorised Officer (Indian Bank)								



TIR YIMYIM YIMOBILEM (EDITRIAL)

DIMAPUR FRIDAY, NOVEMBER (YIMPOKSÜI) 14, 2025

Nagayimten ken o tembangner

Nagayimten tebilemtsü ken o ya kangasa langra atsüshir, anungji ajaki tekaratiba nung tembangner. Ano, tesasatsü aser shisabolutsü kaji, India den Naga yimten ken o metembangtetba ajanga Naga nungter telongjemba aser teputepba akümer masü, saka meputepba aser melongjemba dang akümer, anungji akhidang Naga yimten nüchiso asoshi Naga nungter ka kuma longjemer tenzükba, telok ka agi ana, ana agi asem ta telemsa adoka-adoka tangbo Naga nungter yimten nüchiso bushir telok kwika aliar meshitetka kumogo. Iba ama mapang ka nung, India yimten den ajuruteba jembirtem, Naga nungter nüchiso bushir telok ana, NSCN-IM aser Naga nung yimten nüchiso bushir teloktem kar longjemer tentetba Naga Political Groups (NPGs) nati India den Naga yimten latettsü asoshi tangatettep ken o tamendakdak renema lir, anungji India o Naga nungter na tsüngda Naga yimten ken o benoka jembitsüba mapabo yangji atemer, saka parnok tsüngda tangatettep ken o renema aliba nungji amendaker Naga yimten jenjang temeja ka lateta aotsü asoshi inyakyim latettsüba dang anünga lir. Atangji, NSCN-IM aser NPGs teloktem nung madenba Naga nungter yimten nüchiso bushir teloktema lir, ajisüaka itemji toktsür tang India den Naga yimten latettsü asoshi jembia akaba teloktemi danga yimten ken o ya tatembang kati arua jembitet nungbo, Naga nungter cancer agi shirangba aneper amai süla. Atangji, Naga yimten tebilemtsü latettsü asoshi lenmangbo pia ayu saka iba lenmang jagi aotsü makoker ta aliba terata tia nung, Naga nungter ajak kanga akoksadagi. Naga nungter tema nung alirtemi Naga yimten nüchiso bushirtem ya kar rakzükratemer aser kar ajemajema mena yur saru agi ayongayonga takar akümer amai bilemer, ajisüaka tema nungi yamaji repranger dang ashi, Naga yimten nüchiso bushiba watang nung ajemoka alirtem aika tetoktsüa majung aser metoktsüa majung ta asüba shisabolu tia nung lir. Aji oda, Naga yimten nüchiso bushirtem chimurtemi parnok sülen anidaka Naga yimten nüchiso asoshi nokdakba aikabo mangur, anungji Naga yimten nüchiso angutsüba teimla yangji samadagi ta asenoki rajemtsüla. Ibayongji, Naga nungter aikati Naga yimten tebilemtsü ya talangka moi takoktsü lenmang kar bushia tembangdaksüner. Iba tangatetba nung, tang ita November 18, 2025 nü Nagaland GBs Federation teloki Agri Expo, Dimapur nung Naga yimten tebilemtsü ya kokteta yimten jenjang ka tekaratiba nung latettsüsa lenmang bushiteptsü asoshi shisalemsatepba lokti senden sentong ka ayongzüka lir. Iba senden nung Naga yimten nüchiso bushir telok ajak den Naga nungter kin aser lokti tentet ajak arua adentsü asoshi jaoka lir ta angazüker. Atangji, iba senden nung tayongeri bilemba amaji Naga yimten nüchiso bushir teloktem nungi süshia, Naga kin aser lokti tentet nungi süshia ajakbo marutettsüa akok, saka shirnok tendir parnoki Naga nungter aginüba ken o takang ka India nem agütsütsü imlar. Ashiko, Nagaland GBs Federation ya Naga yimten nüchiso jenjang latettsü asoshi jembitsüba purtembo masütsüa akok, kechiyong parnokji government tenyatenponger ka dang lir, ajisüaka parnokia timtem aser shisabolu maremtet aser Naga yimten tebilemtsü agi menaa melitet, parnok shisa agi atong tashi Naga yimten tebilemtsü ya tekaratiba nung tembangtsü merangdanga inyakba ya Naga nungter asoshi teyari tajung ka arur asütsü. Iba ama Naga nungter teyongya reprangteta, Nagaland nung alir Naga kin ka mesüra anati danga, Naga nungter ajak ayongdena Naga yimten tebilemtsü ken o tembangtsü merangdang asübo, koda jungla ta bilemer. Atangji, FNR telokia kanga junga inyakdagi aser Nagaland GBs Federation teloki merangdanga yaa junger. Ajisüaka, parnok dak dang imlaa melii, ano, Nagaland Legislative Assembly nunga telatetba tajung ka aru matai, parnokiang "Naga Political Commission" ka danga shima Naga yimten tebilemtsü ken o ya tembangtsü merangtsüla.

OLEMSABANG

MUNGDANG ASER LIM AROGOTEM TESENDAKTEP

~ L. Kika Pongener.

Lim arogo kaji; Yisu Khrista agizüka temulung meyipa tzü nung tzüsener tamangertem; tamang ka nung külemi longjema alitsü asoshi sentepba telok ka. Ano mungdangji lim arogotem tamang ka nung külemi longjema; inyakyim ajak nung lirumedema alitsü asoshi longjemba sabang ka....ta tongmelang agi angatettsü akok. Lim arogoji arogopurtemi tershilem tenla, tepela/temoatsü tenla, teka tenla aser tamang tenla agütsüba agi taküm alir; aser toklang tenzükertem nema itasen agütsür. Ano mungdang taküm alitsü asoshi lim arogotem ajaki saru (Budget) agütsür; aser iba saru agütsüba nungji arogo züngsem tulu-tila, takar-sensaker, laishir aser mashir nutsüng ajak dena lir. Küm shia küm tatem nung lim arogotem ajunga nungi teshimtet nubu sentepa inti mongdang (Central Council) lia, küm piyong mungdang aser lim arogotem teinyaktsü mapatong aser sentongtem bangzünga lemteta ayur. Anungji mungdang nungji arogo tuluba, arogo tilaba, laishir, lai mashir, toklang tenzükertem aser nutsüng.... ta kecha tebandang mali arok küsa shilem agitettsüsa temeden kar ta angateter.

Temalen shisemba olen ishika nungji; mungdang aser lim arogotem tesendaktep indang kuli kar nguogo. Aji oda, arogopur nutsüng medeni lim arogo kaji alitsü makok. Ano lim arogotem medeni mungdangji alitsü makok. Temalen shisemba ama mungdang taküm lidaktsütsü atema lim arogotemi saru (Budget) agütsür; ibajagi mungdangji taküm alir. Aji oda, khien tongmelang agi ashitsübo; mungdangji lim arogotem madak temaba sabang....Saka ano lim arogotem ya pei pei temeden akaba (Independent) sabang ka-ka lir. Shitakba kanga junga bilemdangra, mungdangji maliyonga lim arogotemjibo alitsü. Ajisuaka, lim arogotem melira aser medeni mungdangjibo melitettsü; kechiba sura lim arogotem longjemba agidang mungdangji alir. Mungdang saru agi lim arogotemji alir masü; lim arogotemi saru agütsüba agi dang mungdangji taküm alir. Anungji mungdang nungji telemsa makai küsa lirumedema alitsü asoshi mungdang lennirtemi kanga shisa kaa anitsüla.

Ashiko, mapang ka nungpo lim arogo karibo mungdang den sendaktepa, longjema aser amaalitepa meli-i; pei meden lidi ta asütsüba mapang ka arutsüa kecha meteta maka. Tanü lim arogotem nungi Para Churches, Prayer Center, Ministry balala tenung jateta tenzüka aoba amai; ashiko, mapang ka nungpo mungdang nungi razüka telok-tentet balala; laishir mungdang, lai mashir mungdang, Pastor-tem mungdang, nutsüngtem mungdang, arogo tulutem mungdang, arogo tilatem mungdang, town arogotem mungdang aser yimtsüng arogotem mungdang....ta razüka tenzüka aotsüa kecha meteta maka. Anungji iba ama tensa tiaji majurutsü asoshi mungdang lennirtemi; inyakyim ajak nung; kinuk ajaklen kanga junga repranga lirumedema anitsü merangtsüla. Talisa, mungdang nung tenzüktsü tela-tenuk balala nung tenzükertem shimiyim nung kanga shisa kaa shimtsüla. Mungdang mapatong/sentong ajak nung; lim arogo tuluba/tilaba; nutsüng teimba/ishiba; laishir/lai-mashir; toklanga tenzükertem aser nutsüng....ta kecha tebandang meli-i ajak küsa züngshia lirumedema anitsüla.

Mungdang nung mepetmesu aser telemsa meli-i; longjema alitsü asoshi lennirtemi kanga shisa kaa anitsüla. Mungdang nung kechi telemtetba agidir agiaka; tarutsü nung tetsükdaktsü majurutsüsa aser ken o mebulutsüsa; kanga junga shisadanga bilemdanger dang telemtetba agitsüla. Aji oda, kija aser telok kari mungdangji pei jurila meyong amai kibur kuma angateta lira; ajibo kangasa tai tangatetba asütsü. Ano lennir kari tanübo onok mapang, onoki koma aninur iba amaji dang anitsü ta tangatetba lira; ajibo kangasa tamashi tangatetba asütsü. Mungdak inyakyim agi nutsüng-nubur temulung masü ola adokyongjia; kecha hau ta mali; tashiyim agi anir aotsü merangra; item lennir dangji lennir tajung ta majatsü. Tesasatsüka, tanü mungdang nung tenzükertem shimiyim inyakyim reprangdangra.... "Laishir Mungdang" & "Pastor-tem Mungdang" ta ajatsüsa kuma odagi. Hau ta-ka suang....nunga ta-ka suang.... nuburtemibo iba amaji dang asadangteter. Anungji lennirtemi nubur ola angaa; aser nubur nungi shisatsü agia; kinuk ajaklen kanga junga repranga anitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Liangmai Baptist Association Nagaland küm 100 jungogo



NBCC General Secretary Rev. Dr. Mar Pongener-i sentong nung jembiba mapang.

Dimapur, Yimpoksüi/Nov. 13 (TYO): Liangmai area Nagaland nung Khristan yimsü arur küm 100 ajungba benjongmung Liangmai Baptist Association Nagaland-i "Christ the Lord of Ages" omen nung ajemdaker November 12 & 13, 2025 anogotem Public ground, Tening Town nung munga liasü. Iba benjongmung nung shisalen sayur ya General Secretary, Nagaland Baptist Church Council (NBCC), Rev. Dr. Mar Pongener liasü.

Rev. Dr. Mar Pongener-i omen nung ajemdaker jembidang, puti otsü aser alima nung aliba ajak madak Yisu

Khrista tematiba lir, aser tatem maka memelenshiba tashi amendak dak aser jenokdak lir, ta ashi.

Khrista ya putu sa putu Tsüngrem lir, shibai asen menen yong bendanga agütsü, timtem mapang tamang kateter aser Pa dak amangertem asoshi pa tekumtet lir, ta pai ashi.

Putu sa putu Tsüngrem tetetzü Tsüngrem ya tematiba aser tatem maka ta ashir. Pa yashi, tanü aser teti kasa alitsü, ta ashi.

Bodhbar nikongdang Rev. Kamwang Rentta, Pastor, Town Baptist Church Tening ajanga Centenary Jubilee flag atsüket

aser iba sülen Rev. N. Silubo Zeliang, Pastor, Kohima Liangmai Baptist Church D.Block ajanga Centenary Jubilee hall semzütsü aser meshiteta sarasademja liasü.

Rev Wichampau Nchang, Executive Secretary & Chairman, Planning Committee ajanga pela agizükba o jembia liasü.

Kasa sentong nung Rev. Dr. Alunbou Newmai, Executive Secretary, Liangmai Naga Baptist Association Manipur (LNBAM) ajanga jubilee nungo kaket sayatsü aser arogo balala nungi choir temi ken ajanga Tsüngrem tenüng sanga liasü.

Nigeria nung Muslim tribal teloki tamanger 25 tepset

Abuja, Yimpoksüi/Nov. 13 (Agencies): Nigeria nung asaa tamangba yimsü nung ajemdaker nüburtem tepsetba manener aser tesüiba anogo 12 tsüngta ano Khristanpur parnok 25 tepset.

Alima nung Khristan ka atema tamajungtiba linüktem rongnung Nigeria ya ka lir, ta Open Doors indang 2025 World Watch List ajanga ashir.

Tawa iba lokti tentet yagi report ka agütsüba nung, alima tesem balala nung tamangba yimsü mechi tawa Khristanpur nisung 4,476 tepset aser shilem 69 mesüra 3,100 Nigeria nung atalok, ta shia lir.

Iba ya ajanga tamangertem tepsetba, lendong balala ajuruba tejangja sayur.

Nisung meyrirjang aikati pei kidanger mesüra kinunger tem tepsetba mesüra pua bener aoba nguogo. Dangar aikati pei tekülem ki, ki aser alu mitsü kuma rongdoktsüba reprangogo.

Taoba hopta ang Muslim ethnic groip Fulani herdsmen temi Nigeria nung Nasarawa state kübok Khristanpur ana tepset aser Plateau state nunga ana tepset, aser aji masüdang tamanger 11 tepseta liasü, ta Morning Star News ajanga ashi.

Morning Star News ajangasa ashiba agi, jihadist temi Keana County nung yimtsüng ka amak, aser iba mapang nüburtem mejanger liasü. Tamanger ana tepset aser ka pua bener ao.

"Keana Local Government Area ya kumzüka mali kumogo.

Onok sunepa aliba ki, kong onok anisüngzüka liasü, saka tangbo armed bandits indang tesep ka kumogo. Brehostibar aonung mamakdang, Giza tesem nunga nisung pua bener aoba liasü, kong kinungtsü aser kinungbo par kidang nungi pua bener ao, aser tang tashi parnok indang osang kecha mali," ta yangji alir Musa Adamu-i ashi.

Kasa aonung state tiyonglen Fulani shiruru metsürtemi Khristanpur ana aser dangar 11 tepset, ta Morning Star News ajanga ashi.

Nigeria indang Middle Belt nung Khristanpur tepsetba tasü mang agi sünga lir, ta osang balala ajanga ashir.

November 3 nü Fulani shiruru metsürtemi Anwule, Benue state, Nigeria nung Khristanpur ter tepsetba rongnung Flaming Fire Ministry indang Rev. Simon Nbach dena liasü. Iba mapang extremists temi Catholic Church indang ki ka aser nisung aliba ki ter dak tema rongdoktsü.

Ano Kaduna state nung amakdang arishi küm 12 tanur tebur ka densema Khristanpur nisung tenet tepsetba asoshi nisung noklang aikati mangyima liasü.

Parnok ya arishi küm 46 tain Yohanna Adamu, arishi küm 57 tain Bala Bude Chawai, arishi küm 50 tain Yakubu Bala, arishi küm 30 tain Abubakar Ya'u, arishi küm 56 tain Ishaya Dauda, arishi küm 46 tain Monday Nveneh, aser arishi küm 12 tain Savior Emmanuel liasü.

2009 küm nungi Nigeria nung Khristanpur 52,000

tepsetogo aser lendong tulutibaji taküm meyi mapang atalok. June ita nok-nü tesashi bena aliba Fulani jihadists temi Guma County, Benue State kübok Yelwata nung aluyimer aliba yimtsüngtem ananü amakdang Nigeria nung Khristanpur 200 shi tepseta liasü.

Benue State nung Khristanpur timba alir aser Yelwata ya Internally Displaced Persons (IDPs) mesüra anasa jila tem nung taoba mapang Fulani telungpuri amakba ajanga jena aortem aliba tesem ka lir, ta Truth Nigeria nungi Micheel Odeh James-i ashi.

"Benue nung Nigeria nunger million trok nungi tenet tsüngta alir, aser parnok shilem 97 dak tema Khristanpur lir. Parnok ya Baptists, parnok ya Methodists, parnok ya Catholics lir. Nüburtem mejanga aliba mapang parnok kidang mi senloktsür, aser jena aotsü merangertem dak nok agi aleper," ta James-i ashi.

"Nisung karbo ki telung nung shibanga yur gasoline ina mi senloktsür. Kinü tanurtem rongset," ta pai ashi.

US Tir Donald Trump-i tawa ang Nigeria ya Country of Particular Concern nung züngoksem aser Khristanpur kumzüka ayutsü asoshi tali meinyakra teyari agütsüba anentsü aser sorkar nem tenokdangba agütsütsü ta shia lir.

Nüngdakra yariteptsü atema mitkartem yoktsü aser kiralongrar temi Khristanpur dak amakba ama amaktsü, ta pai shia liasü.

ANOGO ABEN TSÜNGREM DEN

Lokti nung kijai ayimtenba ola

Lokti tulu nung asen kija nungdak atema ayimtenba Kibubai angashir.

Tetsü kati benjung ola teyong nung par chiri lulaa ayimtenba ola angashir. Asen Kibuba Yisui telok tulu nung Timia chir Bartimiai ayimtenba ola angashi. Kija takumi pei nungdak meteta Kibuba dang ayimtenba ola jagi telok ateta oa ayimtener. "Aser ku nelai ayimtena ashi, Nazaret nunger Yisu südaki."

Bartimiai pa nungdak meteta liasü. Pa nungdak ajak shiba dak pai temulung alem pa nem dang shiloktsü. "Kibuba, ni nguner." Ni Kibuba dangi ku nungdak tulu shia arudakjang. Kibubai rongsen tulu tekümtet agütsütsü renema alidang ni tila tiri pa dang asüngdangra angutsü. Kechiyong tashi, rongsen, aser taneptsü shisatsü Kibuba dak lir. Ni sarasadem tulu bendenloktsütsüla!

Aser Kibubai taochi agi Bartimia dang sayatenya mapa inyak. "Ne tamang agi na anepogo!" Aseni Kibuba Yisui asen den melemsateper ama bilemaka Pai asen tamang aser aseni tashi anga meranga inyakba nung ulutsür. "Nenok tamang jebi jang taka lira!" Asen nungi pai aginuba ajunga agi ibaji dang lir, aser sayatenya ataloktsü.

Police-i mapa meinyakba mechi tetsür temi longkak aiter

Raipur, Yimpoksüi/Nov. 13 (Agencies): Ita pezü tejakdang Chhattisgarh nung aliba railway station ka nung Hindu activists temi tribal Khristan tsür asem amokmerena merenshiba asoshi obendang khanga lumia longkak ait tenzükogo. Iba ken o nung Catholic nuns ana apu.

Tetsürtem den parnok kinunger aser bhukumer temi Narayanpur district headquarters kima November 10 nü nungi mapang telatet makai lumia longkak ait tenzük.

"Parnok dak teka sangshiba Hindu activists anema police temi ken o mebenokba mechi tetsür temi iba mera agütsüsa akum," ta Communist Party of India (CPI) indang district secretary Phulsingh Kachlam-i ashi, shirnoki iba longkak aitba bhukuma nokdaker.

Tetsür temi yangji aliba police station nungi state nung police tanishir tashi, kishi ajak nung akoshi, saka telangzüba kecha meliasü, ta Kachlam-i osangbener dang November 12 nü ashi.

Chhattisgarh State Women's Commission ajanga October 8 nü state indang Director General of Police dang tetsür temi ashishiba nung ajemdaker ken o benoktsü totuyuba agütsü. Ketdangsür dang hopta ana tsüngta iba mapa inyaker osang agütsütsü ashi.

Ajisüaka iba totuyuba tang tashi mapa kuma meinyaker. "Tang tashi kecha meinyak. Onok nem ochi pbendang magütsü tashi onoki maneni lumitsü," ta iba timtem ajurur aliba tetsür kati ashi.

Onoki akhangba ya indang-indanger, iba tatalokba indang police case ka zülüoktsü.

July 25 nü Durg railway station nung iba timtem ya ajuru, kong tetsürtem den Assisi Sisters of Mary Immaculate nungi nun ana - Sisters Vandana Francis aser Preeti Mary ya tetsür kar densema Hindu activists temi anendaktsü.

Activists temi tetsürtem dang o tamajung shia merenshi aser nuns temi tetsürtem ya tamangba yimsü melendaktsütsü asoshi shibelener ta tai tongloktsü.

Mapang tatsüka lir police temi nisung shibelenba aser tashiyim agi tamangba yimsü melendaktsüba ken o nung nun ana ya apu. Parnok ya anogo toku lir bail nung chiok saka senzüsempongba aser media den jembitsü memela.

"Hindu activists temi tamendak dak tejangja makai tai tongloktsüba nung police tem renema atar inyak, saka state women's commission nungi totuyuba tejangja agüjaka lendong agütsür anema inyaktsü nungnanger," ta Kachlam-i ashi.

Chhattisgarh nung Hindu bhukumba Bharatiya Janata Party-i yimsü asür, kong Khristanpur anema azüdokshi aser timtem tali kumogo.

India ya Hindu nunger kisüng aliba linük ka kumdaktsütsü meranga Hindu telok temi Khristanpur dak tenük yoker, ta Khristan lenirtemi ashir.

Taoba küm iba state nung Khristanpur anema tatalokba 165 tashi New Delhi nung aliba United Christian Forum-i jangjateta liasü.

Chhattisgarh nung nütsüng yongsük 30 million shi aliba nungi Khristanpur shilem ana dang tajemba lir.

AO OSHI ANGAZÜKDAK:**TANÜ ANGAZÜKTSÜBA OJANG****Towatet**

(adj) apetasong maket tetemsü, ternemtet

* Towatet asangur ajaki nükshir.

Tsüa

(adv) sasaeta ashiba (expression of regret)

* Tsüa, pa yamaji anojungi asü nuo ?



Tir Yimyim

OLONG PAITEP # 7329

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ____ tatsü - (3)
12. Tebur kidong aser zünga kasatsüingdajatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7328 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüingdak,
10. Yongya, 11. Kongro, 13. Ora,
14. Ata.

NAI-A YA METETTER

17
AIR

**SANSKRITI TRIVEDY****UPSC CSE 2024**

Bihar kübok Jamui nungi Sanskriti Trivedy-i IAS ketdangsür ka akümtsü atema UPSC exam trokben agütsü. Sanskriti-i 2022 nung UPSC exam pezübenbuba agütsüba nung takok ngua AIR 352 angu aser Indian Defence Accounts Service atema shim. Ajisüaka lai IAS ketdangsür akümtsü alizüing ayuba atongtsü mechi nung UPSC tatidang agütsü aser 2024 küm tatidang trokbenbuba nung AIR 17 tongteta IAS ketdangsür kümogo.

Sanskriti-i 2022 nung Gargi College, Delhi University nungi MA (Political Science with specialisation in International Relations) renema liasü.

Mizoram-i traffic management atema national award angu

Guwahati, November 13, 2025 (Agencies): Haryana kübok Gurugram nung 18 buba Urban Mobility India (UMI) Conference amungdang Mizoram-i traffic management atema naroküm tulu ka nguogo.

Union Housing and Urban Affairs Minister Manohar Lal aser Minister of State Tokhan Sahu nati Urban Development and Poverty Alleviation (UD&PA) Department nung Secretary Lalmalsawma Pachuau nem sempet agütsü.

UMI Conference ya Ministry of Housing and Urban Affairs (MoHUA) kübok Institute of Urban Transport (India) ajanga kümshia ayongzüka amunger. Linük nung smart, eco-friendly, aser inclusive urban transport practices ajungmesotsü atema iba ya national platform ka lir.

UD&PA Department kübok Mizoram nung Town and Country Planning Wing dang award committee nem traffic maparen inyakba agütsütsü mapa lemozüka liasü.

Department-i October 16, 2025 nü presentation aser video agütsü aser iba nung Mizoram sorkari urban traffic flow tajungba kümdaktsütsü atema inyakyim balala tenzüka sayua liasü.

Iba presentation nung sensotemi road rules sülen anidakba, lenmang temesü süaka traffic tiptema senzüba aser traffic management committee ajanga amalitepa inyaksangshiba dena liasü.

Aizawl dang "Silent City" ta ajar aser iba ya sensotemi gari nung horn mamshiba yimya atema lir.

Mizoram sorkari iba sempet

ya nübortem nem bendanga agütsü. Nübortemi amalitep aliba, civic awareness meteta aliba aser road safety akhümtsübuba atema sorkari pelaba metetdaksü.

Ketdangsürtemisa department aser telok balala dang iba sempet angutsüsa maparen balala nung yaritepba atema pelaba metetdaksüogo.

Mizoram nung road discipline ya social media nung nisungtemi teti nükshiba shia arur. Taoba President Ram Nath Kovind-i anir tongtipang nisung aikati iba asoshi tenüingsang agütsüogo.

Mizoram yimtiba Aizawl dang "No Honking City" of India ta ajar. Aizawl nung traffic system balaka sülen anidaker. Four-wheelers-i abelen, two-wheelers-i achiji anir aser overtaking mali.

Mizoram nung tzü agi menatepa tashidak ajanga nisung 5 asü

Aizawl, November 13, 2025 (Agencies): Mizoram kübok Lawngtlai district nung waterborne disease outbreak ka asütsü ta temulung melemb bushisüingdang tenzüko.

Myanmar kübok Salachhuah nung pezü aser Mizoram kübok Kakichhuah nung ka ta taküm samaba sülen iba bushisüingdang tenzüko.

Lawngtlai Deputy Commissioner Donny Lalruatsanga aser Senior Chief Medical Officer Dr. Lalmuanawma Jongte nati anir ketdangsürtemi rongdak senden ka mena tensa asadangogo aser

tashidak azüoktsü atema mapa tenzüko.

Nisung pungu tashi asüba atema kuli jangjatsüla aser tashidak menatepa moudaktsüi noktangtsüla ta DC-i ashi.

"Tashidak atema preventive aser control measures ajak inyaktüla" ta pai tetuyuba agütsüogo.

"November 4 nungi shirangba osangtem angashitsü tenzüko aser November 11 nü Kakichhuah-i medical team ka yok" ta Dr. Jongte-ia ashi.

Iba tesem nungi bendenba water samples ajak Zoram Medical College & Hospital-i tendangtsü atema yokogo.

Myanmar kübok Salachhuah yimtsüing nungi tzü menenba kulitem ngutetogo ta Dr. Jongte-isa metetdaksü.

Tanü tashi nung arishi küm 5 nungi 63 tsüingda nisung 27 dak tashidak aliba putetogo. Rapid Response Team (RRT) ka mapa lemozüksüogo aser local health workers-i tenük yoka reprangdar ta paisa ashi.

Ketdangsürtemi Kakichhuah ya hopta ka atema "containment zone" ta sangoktsüogo. Iba tesem nung medical, election, aser emergency services dak alaka tanüingba nisungtem senzüsönongtsü memelar.

Western Lakhimpur nung ASF ajanga ak aika tepsetogo

North Lakhimpur, November 13, 2025

(Agencies): Lakhimpur district kübok anüolen tsütsü African Swine Fever (ASF) pokteter ita ka shi süia arur. Iba tesem nung tesüiba ita ka tsüingda ak noklang aika tepsetogo aser ak metsürtemi takoksa jenti ajuruogo.

Iba tesem ya Assam kübok Biswanath district aser Arunachal Pradesh kübok Papum Pare district anasa lir.

District veterinary department-i Dhalpur, Rangati, Simaluguri aser item temeket aliba tesemtem 'red zone' ta sangoktsüogo.

Ajisüaka tenokdangbatem agüjaka iba tesem nung pig farms aika nung ASF aliba

osangtem angazüker aser ketdangsürtemi ak aika tepsetogo.

November 9, 2025 nü Jamnagar, Rangati, Dhalpur nung district veterinary department-i Dipen Gogoi'er farm nung ak 30 tashi tepset.

October 26 nunga Lakhimpur district veterinary department-i Dhalpur, Rangati, aser Simaluguri nung ak farm asem nung ASF aliba ak 150 tashi tepseta liasü.

ASF wara prokshiba sülen anogo 45 tashi ak ayokba mesüra belenba maparen noktangtsü takhangba agütsü ta All Assam Pig Farmers Association (AAPFA)-i ashi.

Ajisüaka, October 15 nü AAPFA aser North East

Progressive Pig Farmers Association (NEPPFA) tsüingda senden ka amendang tenoktangba alitsü atema haihaura kati marutet tembang aser iba ajanga iba tesem nung wara prokshi ta AAPFA-i ashi.

Tangalen nungi ASF aliba aktem bener aruba ajanga wara prokshir ta ak metsür aikati ashir.

Lakhimpur nung ASF aliba aktem Sadia ajanga Arunachal Pradesh kübok Namsai aser Tinsukia district leni belener ta osang angazüker. Iba ajanga Assam nung ak metsür 15,000 shi ka asoshi khuretem bentsür arur.

Iba jagi Assam nung ak metsürtemi state sorkar dang ak tepsetba atema temenok meshir.

Tesem ana nung raratsü renema lir: Pak minister Khawaja Asif

Islamabad, Yimpoksüi/ November 13 (Agencies): Pakistan defence minister Khawaja Asif-i maneni tensa mejungi kümdaktsütsüsa, linük anütoklen India den aser linük anüolen Afghanistan den raratsü atema Islamabad kanga junga renema lir ta shiogo.

Lokti senden ka nung o jembiba mapang Asif-i, "onok tesem ana nung raratsü atema renema lir. Onok anütoklen (India) aser anüolen (Afghanistan) naprongla nung renema lir. Mezüngbuba round nung Allah-i onok nem teyari agütsüogo aser tanabuba round nunga pai yaritsü," ta ashi.

Pei temang nung bomb alenoker pokdaktsürtemi

Islamabad nung nisung 12 tepsetba sülen anogo ishika lir Asif-i iba olen lemsatepa liasü. Iba lendong bener arutsüba ya Tehreek-e-Taliban Pakistan (TTP)-i nangzükogo. Iba tesem amakba ajanga Pakistan aser Afghanistan nung Taliban na tsüngda tensa tamajungba kümogo. TTP pur nem teküzmükba agütsüba atema Islamabad-i Kabul aija arudar, koba Afghanistan-i magizüker.

Taoba mapanga tenüng metetshi-i Asif-i Pakistan ya rara nung lir ta ashiba den lisopurtem dang iba azütokshi lendong ya süoki ia agitsü metetdakja liasü.

"Onok rara nung lir. Kari danga Pakistan army Afghan-

Pakistan arrtsü aser Balochistan nung raradar ta bilema lira tanü Islamabad district court amakba ajanga saksalemtsüla. Iba ya Pakistan ajak atema rara lir aser iba rara atema Pakistan Army-i anogoshia taküm bendanga agütsüdar aser nüburtem kümzüka toktsür," ta pai X ajanga ashi.

Kasa mapang nung Pakistan Ato Kilonser Shehbaz Sharif-i, Islamabad amakba ya India-i teyari agütsüba kiralongrar teloktem mapa lir, ta shiogo.

India-i iba taitsüba ya magizük aser Pakistan nunger leniri India aitsüba ya amendaktsü asoshi kuli kecha mali ta shiogo.

Cambodia-i Thai den mangatettep aliba arrtsü nungi nüburtem anin

Phnom Penh, Yimpoksüi/ November 13 (Agencies): Cambodia aser Thailand na mangatettep aliba arrtsü nung tensa mejungi akümba sülen Cambodia-i yimtsüng ka nungi lisopur noklang aika aninogo.

Cambodia nung Banteay Meanchey province kübok Prey Chan yimtsüng nungi kibong 250 shi Brehostibarnü arrtsü nungi km 29 shi pilar Buddhist temple kati anirogo, ta provincial Vice Governor Ly Sovannarith-i ashi.

Iba yimtsüng anasa Cambodia aser Thai nunger sepaitem khatepba mapang nisung ka tenüng agi Dy Nai tepsetba sülen nüburtem ya anina liasü.

Iba lendong nung nisung asem yirua liasü, ta Cambodia Ato Kilonser Hun Manet-i ashi.

Bodhbarnü tatalokba ya linük anapronglai kati ka dang tai tongloksütepegogo aser tenaprongla katia mezüng injang khaloktsüba menangzüki arudar.

Thai Major General Winthai Suvaree-i ashiba agi, Cambodia nunger sepaitemi mezüng injang khaloktsü, kasa mapang nung Cambodia indang Ministry of National Defence-i ashiba agi, Thai nunger sepaitemi nikongtsütsü 3:50 ako shi nungi injang khaloktsü tenzük.

Linük ana tsüngda minute 10 shi khatepa liasü, ta Thai army-i metetdaktsü.

Iba tatalokba ajanga linük ana tsüngda July ita ceasefire atema nangzüktepba dak sendakba nung tasüngdakba

aika adoker. Linük ana tsüngda taküm anogo pongu raratepba sülen nisung aika tepset aser aika pei talidak ki toktsür aotsüsa aküm.

Iba hopta Thailand-i landmines tasen rema toktsüba atema Cambodia aitsüogo, koba Cambodian Defence Ministry-i magizüki liasü.

Hombarnü sepai ka yiru ta ashiba sülen Thailand-i October ita United States Tir Donald Trump matsüngdang ceasefire atema tenangzüktepba yanglushir aliba nung sign sütepba ya aginer ta shia liasü.

Linük ana tsüngda arrtsü km 800 lir aser France-i 1907 küm arrtsü junga melatettsüba ajanga linük ana tsüngda küm aika mangatettep adoka arudar.

US sorkar shibangba tembangtsü bill nung Trump-i meyongnem agütsüogo

Washington, Yimpoksüi/ Nov. 13 (Agencies): House of Representatives nung agizüker ghonda ana majungdang United States Tir Donald Trump-i iba 'federal government spending bill' nung meyongnem agüja, US puti otsü nung sorkar kongsang balala talangtiba shibanga aliba tatem kati arudaktsür, koba ajanga mapa inyaker aser kibongtem dak kongshi aser tayimtsü senzüba nunga kanga sashia kongshia liasü.

Iba spending bill tasenba yagi federal funding January 30 tashi atsülangtsür, koba Republican timba aliba House nung vote 222 - 209 agi bhukuma agizüka liasü. Iba ya Senate nung hopta tetenzüklen agizük, kong Democrats tenet aser independent kati yaritsü mulungtet.

Trump indang meyongnem agütsüba ajanga October 1 nungi tenzüka anogo 43 tashi sorkar shibanga aliba tatem kati arur, aser iba mapang tongtipang services dak alaka sorkar inyakyim ajak anena liasü.

Federal workers temi Brehostibanü nungi pei mapai meyipa otettsü, saka sorkar services aser inyakyim kodang nungi tenzüksüar mejangja.

Iba mapang civil servants 670,000 shi mapa nungi khi

atema anenja liasü, aser ano kasashi taa makai mapa inyaka liasü, saka tangbo parnok taa meyipa angutsü.

Iba 'shutdown' tembangba ajanga linük nung tayimtsü nung senzüsempongba industry nem teimla agütsür.

Christmas matongdang America nunger kibong million aika nem chiyongtsü teyari agütsütsü, koba ajanga benjong mapang senotsü tali indoktsü aliba tebilemtsü ajemtsütsü.

Ajisüaka iba shutdown tenzüka tongtipang ken o - health insurance - mebenteti lir, koba ajanga Affordable Care Act kübok America nunger million 24 nem health insurance subsidies agütsür, aser Trump administration-i iba policy küm tatemi liwaba sülenbo shibangtsü ta ashir.

Healthcare subsidies atema vote ka Senate nung December tashinung agiteptsü lir.

Anogo 43 tashi sorkar shibangba mapang Republicans aser Democrats kati ka tenüng sena liasü, saka katia takok tejangja mongutet.

Sorkar shibangba atema America nunger tesadang kati Republicans tenüng asener aser shilem 47-i Democrats tai ta ashir.

Bodhbbar aonung menur

MULUNGNEN O



LATE IMTISUMAK AO
01.07.1948 - 07.11.2025

"Len aniba teka aser temeim mulungsentüsü aketba tebu tajung ka. Na onok den meliaka, nü temeim, shisatsü aser taochi agi onok anogoshi len anir."

Iba zülü ajanga, Asür Imtisumak Ao indang kinunger temi pa shirangba mapang aser November 7, 2025 nü asüba mapang nübu, shisatsü, rongsen aser sarasadem agi yaritepba kija, tembar, kidanger, arogo aser temulungertem dang pelaba lemsateper.

Nenok temeim aser tayari agi onok mulungjang nung kongshiba ya kodanga jungjunga melemsateptettsü. Iba tejashi mapang temeim agi onok müketpangba atema kanga pelar.

~ Temeim Kinungtsü, Chirnur, Anük-apan & Semchirtem.

KOSASANGER PUSU MENDEN UNGMA SANGDONGER



Auükhurur, KIMATADIVASIASSAM aser VENTHONGALIAS BURBA TIKIR ANATHONGER, tenati yim telongtet nung auüyaba puteta temzüngi merenshir Ungma litsü nung tetsüng ajemoktsü memelar aser teti asoshi litsü atena meindoker.

Tarutsü anogo aser mapang nung item nisung dak Ungma litsü nung medokmeperi kar danga atalokra yimdeni khuret mabentsü ta metetdakja sangdonger.

Sdl- Sdl-
Imtidongba Jamir, Tatar Lipokzulu Longkumer, Tatar
Sdl-
Yimkum Pongen, Tatar

UNGMA SHEMPO ELANGTSÜR TELONGJEM MULUNGNEN O

Kongro Lanuienla Longkumtsur, wabong O. Tinu Longkumer aser watsü Temsunungla Pongentsür jala-i Master of Science, Department of Geology; Bangalore University nungi C. C Suryanarayana Rao Gold Medal jenjang ngutetba asoshi asen Elangtsür-i kanga pelaba den tenüngsang agütsür.

Anünga aliba wadang ajak nung Tsüngremi maneni temoatsü agüjangma ta asen Elangtsür sarasadem.

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND, KOHIMA.

NO.SCERT/TET/GC-3/ 2025

Dated Kohima, the 13th Nov. 2025.

NOTIFICATION

This is to inform all the concerned candidates who have applied for Nagaland-Teacher Eligibility Test - 2025 (N-TET), that the Admit card for the examination (Paper-I and Paper-II) is uploaded in the SCERT website - scertlive.thinkexam.com. Also the list of the rejected candidates will be uploaded in the website - <http://scert.nagaland.gov.in>

The candidates may download their respective Admit Cards for N-TET 2025w.e.f 17th Nov. 2025 onwards and appear the examination on 22nd Nov. 2025 at RÜZHÜKHRIE GOVT. HR. SEC. SCHOOL, KOHIMA.

KEVIRALEÜ KERHUO

Director

SCERT, Nagaland, Kohima

7bubaDimapur Inter-Departmental asayamung tenzükogo

Dimapur, Yimpoksüi/November 13 (TYO): Dimapur Deputy Commissioner office-i ayongzüka 7buba Inter-Departmental Sports Meet 2025 November 13 nü ADC Court, Dimapur anasa Multi-Disciplinary Sports Complex nung tenzükogo. Iba asayamung ya November 15 nü tashi asayatsü.

November 13 nü asayamung lapokba sentong agi aser asayamung tepeyong atema Tsüngrem temaotsü meshizüka District Hospital Dimapur Fellowship Chaplain Rev. Yhunlo Thong-i sarasademer tenzükua liasü. Iba sülen District Sports Office,

Dimapur Kevi, PIS-i asayartem tenangzüktepba agiba sentong ketdangsüa agi.

Iba asayamung ya Additional Deputy Commissioner (ADC), Dimapur Zakabo V. Rotokha, NCS-ilapokja liasü. Asayamung nung Dimapur district kübok department balala anogo asem asaya balala nung tokteptsü.

Iba asayamung ya Dimapur district kübok sorkar department balala yongtsü nung telongjem, teamwork tali adokdaksütsü aser tajungyimi tokteptsü nükjidong nung ayongzükogo.

Asayamung nung badminton (tetsür aser tebur tarep asaya), table tennis (kija aser tarep), carrom, penalty shootout, aser

tetsür o tebur naprongla arr atsütepba amala asaya balala asayatsü.

Asayamung lapokba sentong nung o jembiba mapang Rotokha-i ashiba agi, inter-departmental asayamung ya ketdangsür aser staff tem yongtsü nung tesendaktep akangshitsü atema sabang tajung ka asütsü. Paisa, asayamung nung shilem agiba department temi pei mapa dak alia asaya tanüla chichiba, discipline aser tejangraba sayudar, ta ashi. Mannei pai asayar ajak dang asayar yimya tajung benschia asayatsü, umpire, opponent aser terprangertem akümtsüba asayatsü ajungshia liasü.

Shane Watson Kolkata Knight Riders assistant coach kümogo



Yimpoksüi/November 13, 2025 (Agencies): Kolkata Knight Riders (KKR)-i Brehostibarnü sangdong ka ajanga, IPL 2026 season matong tsüngda taoba mapang Australia nunger all-rounder Shane Watson, team indang assistant coach asütsü shimba sangdongogo.

Watson ya par putu nung white-ball cricket asayartem

rongnung tajungtiba ka lir aser pai Australia tenüng nungi Test 59, ODI 190 aser T20i 58 nung asayaago aser iba mapang format ajak nung international run 10,000 dak tema yangluba den wicket 280 agia liasü.

Pa ya 2007 aser 2015 ICC World Cup Australia team nung tongtibatang asayar ka liasü aser pai pa indang career nung asayamung tongtibatang aika

kokogo.

"Kolkata-i ano takok marok ka bener arutsü atema ni coach aser asayartem den inyaksü yongya atar," ta Watson-i ashi.

Watson ya IPL nung 2008 nungi 2020 tashi asayaago aser iba mapang pa asaya 145 nung asaya aser century pezü tashi yanglua liasü. Pai Rajasthan Royals aser Chennai Super Kings naprongla nung tongtibatang shilem agia team takok dangi aniogo.

Asaya nungi anenba sülen taoba mapang Australia team vice-captain ya coach aküm aser pa linük balala nung T20 league tem nung club balala den inyaka arudar.

Watson pelashishia agizüka KKR CEO Venky Mysore-i, "KKR kibongi Shane Watson pelashishia agizüker. Temaba jenjang nung asayar aser coach ama pa tajangshiba ya team inyakyim aser renemshiba mapang kanga senti asütsü. Pai T20 format angatetba ya world-class lir aser pai ground telung aser tema nung teyari agütsüba ajangshitsü yongya atar," ta ashi.



ODI World Cup akokba India tetsür team Harmanpreet Kaur-i Chennai nung school ka nung kaketshirtem den sensak asema noksa nung angur.

Japan Masters: Lakshya Sen quarters-i iogo



Yimpoksüi/November 13, 2025 (Agencies): India nunger nüngtugu badminton asayar Lakshya Sen-i Brehostibarnü tang asaya aliba Kumamoto Masters Japan nung Singapore nunger asayar Jia Heng Jason Teh straight game nung koka quarterfinals tongtetogo, ajisüaka HS Prannoy bo tsükogo.

2021 World Championships bronze medalist sen shiba iba asayamung nung seventh seeded asayar lir pai world No. 20 Teh ya 21-13, 21-11 agi minute 39 nung dang ayong ayonga koka liasü.

World No. 15 Sen ya quarterfinals nung taoba mapang Singapore nungi world champion Loh Kean Yew den asayatsü.

Brehostibarnüsa Prannoy

tanabuba round nung Denmark nunger asayar Rasmus Gemke-i 18-21, 15-21 agi kokogo. Tena tsüngda minute 46 asaya liasü.

Asaya nung nung mezüngbuba game ya Lakshya 8-5 ta tejakdang ser tenzük. Break atongtsü lia Teh ya 10-9 ta point ka agi timba liasü. Tena ya point 14-13 tashi kanga toktep asaya, saka iba sülen Lakshya-i point tenet atonga ngua pai asaya koka liasü.

Court melentepba sülen Lakshya-i asaya taliba amokbanger asayar aser pa yakta dang 5-0 agi tejakdang aküm aser break tashi nung pa 11-3 agi tejakdang liasü. Anisüngzüka sülena Sen-i maneni asaya amokbanger asaya aser asaya ya 21-11 agi ayong ayonga koka liasü.

S Lanka & Zimbabwe na den asayatsü aliba T20 tri-series Rawalpindi nung asayatsü

Yimpoksüi/November 13, 2025 (Agencies): Pakistan Cricket Board-i Pakistan, Sri Lanka aser Zimbabwe ta linük asem asayatsü aliba taruba T20 tri-nation series atema mapanglem melenshiba jangjatsüogo aser asaya ajak Rawalpindi nung asayatsü.

Anogo ishika tejakdang Islamabad nung pei temang nung bomb alenoker pokdaksürtemi lendong bener arutsüba sülen security dak sendakba nung tebilemtsü akaba ajanga yimti ka nung dang iba asayamung asayatsü telemteba agiogo.

Iba asayamung ya November 18 nü Pakistan aser Zimbabwe na Rawalpindi Cricket Stadium nung asaya-a tenzüksü. November 29 nü final asayatsü aliba densema asaya ajak nikongtsütsü 6 ako nungi tenzüksü. Team shia league stage nung asaya pezüzü asayatsü aser temaba jenjang nung tembangba team ana final asayatsü.

Mongolbarnü Islamabad nung lendong ataloka nisung 12 tashi tepsetba sülen security dak sendakba nung tebilemtsü liaka Sri Lanka Cricket-i linük nungi

asayartem dang Pakistan toktsür maotsü tetuyuba agütsür aliba mapang tang iba telemteba ya agiogo.

PCB mendenbuba Mohsin Naqvi, shiba linük interior minister lir, pai ainertem nem security tajung agütsütsü atema Sri Lanka indang High Commissioner aser ketdangsür tejentem den ajurutepogo

Naqvi-i Pindi Cricket Stadium-i tsüngtong oa security asadangogo aser iba asayamung methitsüba atema Sri Lankan board dang kanga pelaba lemsatep.

Iba asayamung nung shilem agitsü atema Zimbabwe team-a Brehostibarnü Pakistan tongogo, koba 2026 T20 World Cup atema renemshitsü asoshi kanga tongtibatang asayamung ka asütsü.

Mapanglem:

18 Nov - Pakistan vs Zimbabwe
20 Nov - Sri Lanka vs Zimbabwe
22 Nov - Pakistan vs Sri Lanka
23 Nov - Pakistan vs Zimbabwe
25 Nov - Sri Lanka vs Zimbabwe
27 Nov - Pakistan vs Sri Lanka
29 Nov - Final.

BILEMDANGANG

"Nü mulung nung kechi ali
aji nü mapa agi sayur."